

J. Ummel

Sunntigmorge uf em Grat

(?-Dur) (st. Jodel)

Äs steit ä junge Hüeterchnab
vor sir Hütte ufem Grat.

Lost, wie d'Chiucheglogge lüte,
sehnet sich na sine Lüte.

Gseht är se dür ds Wägli gah,
jutzt är eis, was use mah.

Dert na däm Hüsli z'nächst am
Bach,

unger ds nidre Schindeldach,
tuet är mitem Spiegel blinke,
will ihm öpper Liebs tuet winke.

U är ma si nümme bha,
jutzet eis, was use mah.

Är gseht wit über Land u See,
ueche bis zum Firneschnee.

Hie vergisst är siner Sorge,
fiiret fröhlech Sunntig-Morge.

Drum man är sich nümme bha,
jutzet eis, was use mah.